

# Qalam

KDN. 2180

M.C.(P) 2813/58

Dhu al-Hijjah 1385

April 1966

Bilangan 189

60 sen

## Sekali Lagi “Mulut Kamu Harimau Kamu”

Ada dua peristiwa yang molek menjadi perhatian pemimpin-pemimpin kita untuk memikirkan betapa kesulitannya orang-orang kita menghadapi sesuatu perkara dengan tidak memandang akibat-akibat yang bakal terbit daripada perkataan-perkataan yang diucapkannya dan kesan-kesannya kepada masyarakat sendiri khususnya dan kepada dunia umumnya.

Yang pertama ialah persoalan mengenai dengan Konfrontasi Indonesia.

Yang kedua ialah mengenai dengan hubungan Malaysia dengan Filipina.

Di dalam hubungan yang pertama, riak-riaknya telah ada bahawa hubungan-hubungan yang sulit pada masa yang lalu mungkin ada di antara kerajaan Malaysia dengan Indonesia untuk mencari jalan dengan cara damai, berbaik-baik di antara satu sama lain. Bagi menyelesaikan persoalan-persoalan yang telah berjalan yang telah memakan beberapa banyak jiwa di antara kedua pihak yang bersaudara dan sedarah daging itu.

Tengku Abdul Rahman, sebagai ketua negara semestinya hendaklah berhati-hati di dalam mengeluarkan tiap-tiap perkataan dan menghalusi apa-apa kesan yang bakal timbul daripada perkataannya kepada umum. Tidak ada orang yang tidak

mengetahui bahawa cita-cita Tengku Abdul Rahman keluar atau ke dalam adalah bertujuan satu – untuk menegakkan perdamaian dan mencari persahabatan sebanyak-banyaknya. Untuk ini segala usaha yang dijalankan kepada tujuan itu mestilah diusahakan dengan sulit tetapi malangnya di dalam perkara-perkara yang berhubung dengan Indonesia, Tengku mudah sekali mengeluarkan kata-kata mengatakan ada perutusan-perutusan di antara orang-orang Indonesia sama ada yang pro Sukarno atau tidak. Perkara yang demikian ini akibatnya hanya menimbulkan pengharapan sedang barang yang diharap-harap belum masuk dan pula boleh menimbulkan pandangan-pandangan umum di luar negeri seolah-olah bererti perdamaian itu dikehendaki oleh orang Indonesia sendiri dan kita, orang di Tanah Melayu hanya menunggu kehendak mereka dan kita lebih utama daripada mereka.

Kesan yang demikian ini amat buruk kerana akan menimbulkan hal-hal yang tidak diinginkan dan akan menjadikan perasaan yang bakal merendahkan sebahagian pihak. Dan secara mencari perdamaian sifat yang demikian itu hendaklah dijauhkan. Dan kerana itu jika hubungan-hubungan yang seumpama itu adalah lebih molek mendiamkan diri.

Menjadi seorang pemimpin janganlah hendaknya selalu apabila dicucuk terus melatah. Hendaknya seseorang pemimpin itu tetap dan mendiamkan diri tetapi pekerja<sup>1</sup> dan terus bekerja untuk faedah bersama.

Begitu juga persoalan mengenai dengan hubungan di antara Malaysia dengan Filipina. Adalah nampaknya terlalu awal bagi seorang pemimpin, seperti Tengku Abdul Rahman memberi sesuatu kenyataan kepada umum walaupun di dalam akhbar-akhbar hal yang demikian itu bergolak dan beralun dengan hebat menyiarkan berita-berita kemungkinan yang bakal ada menyatukan semula di antara Malaysia dengan Filipina dengan secepat mungkin.

<sup>1</sup> Perkataan sebenarnya ialah bekerja.